

# SAN PEDRO ITLATITLANIL IN DIOS YAKINIKA OKIJKUILOJ YIN AMATLAJKUILOLE

---

**Pedro okintlajkuililij in tokniwan tlaneltokakej  
katlej xintokej itech oksekimej paismej**

**1** Nej niPedro, niitlatitlanil in toSeñor Jesucristo. Namechtlajkuililia namejwan katlej ankajtejkej amochan iwan anyajkej anmochantitoj intech oksekimej paismej de Ponto, de Galacia, de Capadocia, de Asia iwan de itech país de Bitinia. <sup>2</sup>Dios oamechpejpenke desde ya wejkawitl iwan okimatia nik se tonale namejwan ankineltokanij in toSeñor Jesucristo para ijkón anyeskej ikonewan Dios. Iwan por yonik in Espíritu Santo oamechyolchipaj ika ieso in toSeñor Jesucristo para xiwelikan xiktlakitakan. Ma Dios kipia weyi iteiknotlamachilis amonawak iwan ma amechmaka yolosewilistle.

## Tonemilis katlej tikpiaj inawak Jesucristo

<sup>3</sup>Ma tikweyikixtikan toTajtzin Dios katlej iPapan toSeñor Jesucristo. Porke toTajtzin Dios okipixke weyi iteiknotlamachilis towan iwan otechmakak yankuik nemilistle inawak Jesucristo katlej Yej okiyolitij satepan de omikke. Iwan por yonik axan tejwan tikchiaj tlan satepan techmakas. <sup>4</sup>Porke ompa ilwikak techpialijtok tlan Yej yokijtoj techmakas, katlej mach palanis iwan nion mach ijtlakawis, iwan nion mach pojpoliwis ken xochitl nijuak piliwi. <sup>5</sup>Iwan komo namejwan ankipiaj tlaneltokalistle inawak Dios, por yonik in Yej amechmonekuitlawijtos ika ipoder. Iwan nijuak ajsis in sa iyakatlanka tonale, ikuakón Yej amechititis kenik amechmakixtis.

<sup>6</sup>Por yonik moneki sa tekitl xipakikan, maski ok antlajywiskej miek tlamantle de neyolkokole kanaj ok keski tonale. <sup>7</sup>Iwan ijkón ken nijuak in tlakaj kiyeykoaj in oro ijlik tlitl para kipiaskej in oro katlej sa tekitl kuale, toTajtzin Dios no ijkón kichiwa towan. Yej kitekawilia ma tipanokan tlajyowilistle para kiyeyekos totlaneltokalis para kitas kox melawak kuale tikneltokaj. Iwan nijuak kiyeyekoa totlaneltokalis, yon okachi ipatij iwan amo ken oro katlej ajsi tonale tlami. Tones, tla tejwan melawak kuale

tikneltokaj in toSeñor Jesucristo, in toTajzin Dios Yej techweyikixtis, techweyimatis iwan techpialis tetlakitalistle nijuak in toSeñor Jesucristo walmuikas oksemi.

<sup>8</sup>Namejwan ankitlasojtlaj in toSeñor Jesucristo maski mach keman ankitaj. Maski namejwan axan mach ankitaj, namejwan ankineltokaj, iwan sa tekitl anpakij. Iwan yon pakilstle sa tekitl weyi katlej ankipiaj ipan amoyolo ke asta mach anwelij ankijtaj ika tlajtole. <sup>9</sup>Namejwan ankipiaj pakilstle porke Dios kimakixtia namoanima ijkón ken Yej okijtoj kichiwas tla amejwan ankineltokaskej.

<sup>10</sup>Ya wejkawitl in profetajtin okikuilojkej kenik in Dios kipias weyi iteiknotlamachilis towan, pero yejwan mach okimomakakej kuenta tlan okikuilojkej. Yejwan okimomachtijkej tlan okikuilojkej porke okinekiaj kimatiskej kenik in Dios techmakixtis. <sup>11</sup>Cristo iEspíritu oyeka intech in profetajtin, iwan okinmakak tlalnamikilistle para ma kikuilocan tlan Cristo panoani de yen tlajyowilistle. Iwan noijki okikuilojkej kenik in Cristo satepan kipiani weyi tlanawatijkayotl. Yejwan okinekiaj kimatiskej akin yon tlakatl katlej ijkón tlajyowiani iwan keman ijkón tlapanoani. <sup>12</sup>Pero Dios okichij ma kimomakakan kuenta ke tlan okikuilojkej mach para yen tlakajtin katlej oyekaj itech yon tiempo. Sino okikuilojkej para yen tejwan katlej axan tikkakij itlajtol in Dios para ma tikkomakakan kuenta. Iwan katlej oamechmatiltijkej in kuale tlajtole katlej temakixtia, oamechmatiltijkej ika ipoder in Espíritu Santo katlej Dios okualtitlanke de ilwikak. Iwan tlan namejwan oamechmatiltijkej kijtosneki yen yon tlajtole katlej ya wejkawitl okikuilojkej in profetajtin. Iwan onkaj sekin tlamanle ke asta yen angelestин kinekij kimomakaskej kuenta nochi tlan Dios techilwia de yen Cristo.

### Dios kineki ma tchipawkanemikan

<sup>13</sup>Por yonik, xikyektlalikan namotlalnamikilis para ankichiwaskej tlan kuale. Xikchiakan ika nochi amoyolo tlan Dios ika iteiknotlamachilis amechmakas nijuak in toSeñor Jesucristo walmuikas oksemi. <sup>14</sup>Moneki xiktlakitakan Dios porke namejwan anikonewan. Ayakmo xitlajtlakokan ika namotlalnakayo ken achtoj ankichiwayaj nijuak ayamo ankixmatiaj itlajtol in Dios. <sup>15</sup>Sino, moneki ke nochi tlan ankichiwaskej xikchiwakan ika amoyolo chipawak, ijkón ken Dios Yej yolchipawak katlej oamechnotzke para xiekan anikonewan. <sup>16</sup>In tiotlajkuilole ijkín kijta: “Namejwan xiekan anyolchipawakej porke Nej niyolchipawak.”

<sup>17</sup>Tla amejwan ankilwiaj “Papan” in toTajzin Dios nijuak ankinotzaj, in yon kuale kajki, pero moneki nochipa xiktlakitakan asta ikuak anmikiskej de ixko yin tlaltikpak, porke Yej mach kinchichikotlasojtlas in tlakaj

níkuak tlaixkomakas (tlatzonmanas). Yej kinmixkomakas nochtin tlakaj katlej kichiwaj tlan kuale iwan katlej kichiwaj tlan amo kuale. <sup>18</sup>Namejwan ankimatij nik mach itlaj ipatij in nemilistle katlej achtoj ankipiayaj. In ya wejkawitl namoweyitajwan no ijkón oyekaj, iwan yejwan oamechititijkej ijkón xikchiwakan. Pero Dios oamechmakixtij de itech yon nemilistle katlej mach itlaj ipatij. Yej okitlaxtlaj para oamechmakixtij iwan mach okitlaxtlaj ika oro o noso ika plata katlej ajsi tonale tlami. <sup>19</sup>Sino okitlaxtlaj ika ieso in toSeñor Jesucristo níkuak omikke, iwan yon ieso sa tekitl patíoj. Ya wejkawitl in tlakaj okimikiyaj se ichkatzin katlej sa tekitl kuale iwan chipawak para okimakayaj in toTajtzin Dios kej se tlamanale, Cristo no ijkón omikke por tejwan maski mach okipixke nion se tlajtlakole. <sup>20</sup>Ya wejkawitl desde ijkón ayamo oyeka in tlaltikpak, in toTajtzin Dios desde ijkón okipejpenke in Cristo para ma miki por amejwan iwan ijkón welis amechmakixtis itech yinmej tonaltin porke Yej sa tekitl amechtlasoxtla. <sup>21</sup>Iwan por yen tlan Cristo okichij, namejwan ankineltokaj in Dios katlej okiyolitij in Cristo satepan de omikke, iwan satepan okimakak weyi tlanawatijkayotl. Iwan ijkón axan namejwan ankitlaliaj nochí namotlaneltokalis inawak Dios iwan ankchiaj se tonale anyeskej inawak.

<sup>22</sup>Axan namejwan ya anyolchipawakej porke ankineltokakej itlajtol in Dios katlej melawak, iwan ijkón axan welis ankintlasoxtlaskaj in tokniwan. Por yonik moneki sa tekitl ximotlasoxtlakan se iwan oksé ika nochí amoyolo. <sup>23</sup>Namejwan ya antlakatkej oksemi, pero amo antlakatkej oksemi de intech amotajwan katlej ajsi tonale mikij, sino namejwan antlakatkej itech itlajtol in Dios katlej amechmaka yankuik nemilistle katlej mach keman tlamic. Porke itlajtol in Dios yolitok iwan yetos iktlanke (ik tlami).

<sup>24</sup>In tiotlajkuilole ijkín kijta:

Nochtin tlaltikpaktlakaj katej ken xiwitl porke mach wejkawaj.  
Iwan nochí tlan kipiaj in tlaltikpaktlakaj yon ken xochitl katlej ajsi tonale piliwi.

In xiwitl waki iwan ixochio tepewi.

<sup>25</sup>Pero itlajtol in Dios yetos iktlanke (ik tlami).

Iwan yin itlajtol in Dios yen katlej namejwan ya ankikakej.

**2** Por yonik, xikkawan se lado nochí tlan amo kuale iwan ayakmo keman xitlakajkayawan, ayakmo xiekan anteixkajkayakej, ayakmo intech ximoxikokan in oksekimej, iwan ayakmo xiekan antlajtoltlatlalijkej. <sup>2</sup>Ijkón ken selikkonemej kinekij leche para ika moskaltiaj, namejwan noijki xiknekikan itlajtol in Dios katlej melawak para ika ximoskaltikan iwan ika ximomakixtikan. <sup>3</sup>Namejwan ya ankimomakakej kuenta nik in Dios sa tekitl kuale tlakatl.

### Cristo kajki kej se tetl katlej yolitok

<sup>4</sup>Ximijkuanikan, kiné, inawak in toSeñor Jesucristo katlej kajki kej se tetl katlej kipia nemilstle. In tlakaj mach okinekej iwan okitlalijkej se lado, pero yon tetl yen katlej Dios okipejpenke. Yon tetl para Dios sa tekitl patíoj iwan sa tekitl kuale. <sup>5</sup>Iwan tejwan titlaneltokakej katlej tikpiaj yankuik nemilstle noijki tikatej ken temej katlej Dios ika kichiwa se tiopan katlej mach mota. Iwan namejwan ankitekipanoaj in Dios itech yon tiopan kej antiopixkej anyolchipawakej, iwan ankimakaj in toTajtzin Dios namonemilis kej se tlamanale katlej kipaktia porke namejwan ankineltokaj in Jesucristo. <sup>6</sup>Por yonik in tiotlajkuilole noijki kijta:

Xikitakan, Nej niktlalia itech weyikan de Sión se tetl katlej Nej onikpejpenke, katlej okachi kichikajtos notiopan, iwan katlej sa tekitl patíoj.

Iwan akin tlaneltokas inawak yon tetl mach keman mopinatis.

<sup>7</sup>Para tejwan katlej tikneltokaj tikitaj in yon tetl nik sa tekitl patíoj. Pero in tlakaj katlej amo kineltokaj, mochiwa tlan kijta in tiotlajkuilole:

In tetl katlej in kalchijkej mach okinekej,  
omochij yen tetl katlej okachi kichikajtok in kale.

<sup>8</sup>Iwan noijki mochiwa tlan kijta in tiotlajkuilole:

Se tetl katlej ika motepotlamiskej, se tetl katlej kinmayawis.

Yejwan motepotlamiaj iwan mopoloaj porke mach kineltokaj itlajtol in Dios. Dios ijkón yokitlalij ma panokan.

### Katlej iaxkawan Dios

<sup>9</sup>Pero namejwan Dios oamechpejpenke para xipowikan itech ipueblo, namejwan antiopixkej de yen toRey. Namejwan ankatej kej se pueblo de tlaneltokakej yolchipawakej katlej iaxkawan Dios. Dios oamechpejpenke para xiktematiltikan tlan kuale katlej Dios kichiwa. Yej oamechnotzke para xikisakan de ijtek tlatleyualotl iwan xikalakikan ijtek tlanextle katlej sa tekitl kuakualtzin. <sup>10</sup>Achtoj namejwan mach anpowiaj itech ipueblo in Dios, pero axan ya anpowij itech ipueblo. Achtoj namejwan mach akaj oamechiknomatia, pero axan Dios yoamechiknomatke.

### Xiekan para ankitekipanoskej in toTajtzin Dios

<sup>11</sup>Notetlasojkaikniwan, namejwan ankimatij nik anpowij ompa ilwikak maski axan san anpanokoj kanaj keski tonale ixko yin tlaltikpak. Por yonik, namechtlatlawtia xikkawakan se lado tlan amo kuale tlan kiyoltilana namotlalnakayo katlej kineki kijtlakos namoanima. <sup>12</sup>Xichipawkanemikan inmixpan tlakaj katlej mach kixmatij Dios. Iwan maski yejwan ma

tlapoakan de amejwan iwan ma kijtokan mach ankualtin, yejwan kitaskej tlan kuale katlej ankichiwaj, iwan ijkón yejwan welis kiweyikixtiskej in toTajzin Dios nijuak Yej witz para kinmixkomakas (kintzonmanas).

<sup>13</sup>Xikintlakitakan nochtin in tlatlanawatijkej katlej in tlakaj kintlaliaj ixko yin tlaltikpak porke toTajzin Dios ijkón kineki ma tikintlakitakan. Xiktlakitakan in weyi tlanawatij rey, porke yej kipia okachi weyi tlanawatijkayotl ke oksekimej. <sup>14</sup>Iwan nojki moneki xikintlakitakan in gobernadortin tekiwajkej, katlej in rey kintlalia para ma kintlajyowiltikan katlej kichiwaj tlan amo kuale, o noso para ma kinweyimatiikan katlej kichiwaj tlan kuale. <sup>15</sup>Porke Dios kineki ma tikchiwakan tlan kuale, para ijkón katlej mach tlalnamikilisejkej amo ma techistlakawikan de itlaj tlamantle katlej yejwan mach kimatij.

<sup>16</sup>Namejwan Dios yoamechmakixtij de imak in Amo Kuale Tlakatl, pero amo ok xitlajtlakokan maski ya anmomakixtijkej. Sino xiktekipanokan toTajzin Dios porke Yej oamechkoj para xiekan iaxkawan. <sup>17</sup>Moneki xikintlakitakan nochtin tlakaj. Xikntlasojtlakan nochtin tokniwan, xikimakasikan toTajzin Dios, iwan xiktlakitakan katlej okachi weyi tlanawatij rey.

### **Ma tikxikokan in tlajyowilistle ken Cristo okixikoj**

<sup>18</sup>Namejwan antlakaj katlej oamechkojkej, moneki xikintlakitakan namotekowan iwan xikchiwakan tlan yejwan amechnawatiaj. Tla namotekowan kuale inyelis o noso amo kuale inyelis, namejwan xikintlakitakan. <sup>19</sup>Tla anpanoskej tlajyowilistle iwan ankixikoskej, maski mach ankichiwaj tlan amo kuale, in Dios amechtiochiwas porke namejwan ankinekij ankichiwaskej tlan Yej kineki. <sup>20</sup>Pero tla amejwan amechtlajyowiltiaj porke ankichiwaj tlan amo kuale, tonses mach se amechweyikixtis tla ankixikoskej in tekokojkayotl. Pero tla ankichiwaskej tlan kuale iwan ankixikoskej in tlajyowilistle, tonses Dios amechtiochiwas. <sup>21</sup>Dios oamechnotzke namejwan para xikxikokan yon tlajyowilistle porke Cristo nojki otlajyowij por amejwan, iwan oamechmakak se ejemplo para nojki xikxikokan ijkón ken Yej okixikoj. <sup>22</sup>Yej mach okichij nion se tlajtlakole, iwan nion mach keman akaj okikajkayaj ika itlajtol. <sup>23</sup>Nijuak okiwijwikaltiayaj in Cristo, in Yej mach itlaj okinnankiliaya. Nijuak okitlajyowiltiayaj, Yej mach okinmajmawtiaya itlaj kintoktis, sino nochí okikawayá imak toTajzin Dios katlej nochipa tlaixkomaka (tlatzonmana) ken moneki. <sup>24</sup>Iwan Cristo okitlaxtlaj in totlajtlakol itech itlalnakayo nijuak omikke itech krus. Para ijkón tejwan welis tikkawaskej in tlajtlakole iwan welis tikpiaskej in tonemilis chipawak ken Dios kineki. Cristo okioxojxolejkej itech itlalnakayo para tejwan otipajtikej de yen

tlajtlakole, kijtosneki Cristo omikke para otechmakixtij de itech tlajtlakole.  
**25** Tejwan achtoj otinemiaj kej ichkamej nijuak mopolojtinemij, pero  
 axan yotimokuepkej inawak toSeñor katlej kajki kej toTlajpixke iwan kej  
 toTlamonekuitlawij de toanima.

### **Kenik moneki yeskej katlej tlanamiktiltin**

**3** Ijkón noijki, namejwan katlej ansiwamej katlej anmokichwajkej,  
 moneki xikinkawilikan namookichwan yejwan ma amechyekanakan.  
 Ijkón tla akaj se de amejwan kipia iokich katlej amo kineltoka itlajtol  
 in Dios, iwan kitas isiwa kichiwa tlan kuale iwan tetlakitak, tonses  
 iokich welis kineltokas itlajtol in Dios maski isiwa amo ma kitlapowi.  
**2** Porke yej kimomakas kuenta nik melawak chipawkanemi isiwa iwan  
 melawak tetlakitak. **3** Namejwan ansiwamej nijuak anmochijchiwaskej,  
 amo xikyektlalikan namotzonkal para ika anmoweyinekiskej, amo  
 ximochijchiwakan ika oro, o noso ika amotzotzol patíoj. **4** Sino xiekan  
 ankualtin tlakaj iwan xiekan anpasensiajtin, iwan ijkón ankipiaskej  
 amochijchikayo katlej mach keman tlamis, iwan yen yon katlej okachi  
 ipatij inawak Dios. **5** Porke ya wejkawitl ijkón nik omochijchiwayaj in  
 siwamej yolchipawakej. Yejwan okitlaliayaj nochí intlaneltokalis inawak  
 Dios iwan okinkawiliayaj inmokichwan ma kinyekanakan. **6** Ijkón ken  
 Sara noijki okitlakitak in Abraham katlej oyeka iokich iwan okinotzaya  
 “tataj”. Iwan namejwan welis anyeskej kej anteichpokawan de Sara tla  
 ankichiwaskej tlan kuale ken yej okichij, iwan ijkón mach anmomawtiskej  
 de itlaj.

**7** Ijkón noijki namejwan tlakajtin katlej ansiwayejkej, moneki xiekan ika  
 kuale inwan namosiwawan, iwan xikmomakakan kuenta nik in siwamej  
 mach chijchikawakej ken namejwan anmokichtin. Moneki xikintlakitakan  
 namosiwawan, porke Dios ika iteiknotlamachilis noijki kinmaka in siwamej  
 yankuik nemistle kej se tlatliokolile ijkón ken namejwan amechmaka. Tla  
 ijkón ankichiwaskej, tonses mach itlaj kitzakuilis namotiotzajtzilis para  
 amechnankilis in toTajtzin Dios.

### **Tlakajtin katlej tlajyowiaj porke kichiwaj tlan kuale**

**8** Iwan axan nikneki namechilwis yin tlajtole. Aminochtin xikpiakan  
 san se namotlalnamikilis. Tla namokniwan pakij o noso moyolkokoaj,  
 namejwan noijki xipakikan o noso ximoyolkokokan ken yejwan.  
 Xikintlasojtlakan amokniwan, xiteknomatikan iwan xiekan ankualtin  
 tlakaj. **9** Tla akaj amechtuktia itlaj mach kuale, amo xikkuepaltikan.  
 Tla akaj amechilwia san tlan amo, namejwan amitlaj xikilwikan. Sino

## 1 PEDRO 3

moneki xiktlajtlanilikan in Dios ma kintiochiwa, iwan tla amejwan ijkón ankichiwaskej, toneses in Dios amechtiochiwas. <sup>10</sup>In tiotlajkuilole kijta:

Akin kineki yetos ika kuale iwan kineki kipias pakilstle,  
moneki ayakmo ma kijto tlan amo kuale  
iwan ayakmo keman ma tlakajkayawa.

**11** Moneki kikawas se lado tlan amo kuale, iwan ma kichiwa tlan kuale.  
Moneki ma kitemo de kenik yetos ika kuale inwan oksekimej, iwan  
yen yon ma kitemojto nochipa.

**12** Porke toTajtzin Dios kinmonekuitlawia katlej kichiwaj tlan kuale  
iwan kinkakilia intiotzajtzilis.  
Pero Dios mach kinwelita katlej kichiwaj tlan amo kuale.

**13** Tla amejwan ankichiwaskej tlan kuale, toneses mach akaj  
mixewis amechtoktis itlaj mach kuale. **14** Iwan maski in tlakaj ma  
amechtajyowiltikan por ankichiwaj tlan kuale, namejwan xipakikan.  
Namejwan amo xikinmiimakasikan iwan nion amo ximomawtikan.

**15** Sino moneki xiktlakitakan in Cristo ipan namoyolo porke yen  
namoTeko. Tla akaj amechtlajtlanis tlanik ankineltokaj in Cristo iwan  
tlanik anmochiaj inawak, namejwan xikmatikan kenik ankinnankiliskej,  
pero xikinnankilikan ika kuale amoyolo iwan ika tetlakitalistle.

**16** Xichipawkanemikan para ma chipato namotlalnamikilis. Iwan katlej  
tlapoaj mach kuale de amejwan pinawaskej porke nochtin kimatiskej nik  
namejwan ankichiwaj tlan kuale porke antlaneltokaj inawak Cristo. **17** Tla  
namejwan antlajyowiskej por ankichiwaj tlan kuale, toneses xitlajyowikan  
kiné, tla Dios ijkón kimonekiltis. Pero tla namejwan antlajyowiskej por  
ankichiwaj tlan amo kuale, toneses yon kemaj mach kuale kaj.

**18** Porke Cristo noiiki otlajyowij iwan omikke san se buelta iwan  
okitlaxtlaj in totlajtlakol. Yej mach oyeka tlajtlakolej pero Yej omikke por  
tejwan katlej titlajtlakolejkej para techwikas inawak Dios. Iwan maski  
in tlakaj okimiktijkej itlalnakayo, Yej omoyolkuik ika iEspíritu. **19** Iwan  
ika iEspíritu in Jesucristo oyáj iwan okinmatiltij de itlajtol in espíritus  
katlej axan tzaktokej kan Dios okintlalij ma tzaktokan, **20** katlej ya  
wejkawitl mach okineltokakej in toTajtzin Dios. Dios okipixke pasensia  
iwan okinchixtoka miek tonale para ma moyolkuepakan mientras Noé  
okichiwaya in weyi barko. Iwan yon barko okinmakixtij san chikueyi  
tlakaj de ijtek atl. **21** Iwan nekáj atl axan tejwan noiiki techmakixtia, porke  
nijuak timokuateekiaj tikteititiaj nik ya tikpiaj yankuik nemilistle porke  
Cristo omoyolkuik. Pero amo timokuateekiaj para ma chipawi totlalnakayo,  
sino para ma techmakixti de totlajtlakol iwan ijkón welis timijkuaniskej  
inawak Dios ika totlalnamikilis chipawak. **22** Iwan Jesucristo oyáj para  
ilwikak iwan ompa kajki ik iyekma in toTajtzin Dios. In toSeñor Jesucristo

kinnawatia nochtin angelestин, iwan nochtin katlej kipiaj tekiwajkayotl, iwan nochtin katlej kipiaj poder.

### Tla tikneltokaj in Cristo moneki noiiki titlajyowiskej

**4** Cristo otlajyowij itech itlalnakayo nijuak omikke, iwan por yonik in tejwan noiiki moneki amo ma tikimakasikan nijuak titlajyowiskej por Yej. Porke akin tlajyowia itech itlalnakayo kijtosneki yokikaj in tlajtlakole,<sup>2</sup> para ayakmo kichiwas tlan kineki itlalnakayo. Sino kineki kichiwas tlan Dios kineki asta ikuak mikis de ixko yin tlaltikpak.<sup>3</sup> Namejwan ankichiijkej miek tlajtlakole nijuak anyekaj ken tlakaj katlej mach kixmatij Dios. Achtoj namejwan anmomekatiaj iwan ankichiwayaj miek tlamantle mach kuale katlej okinekia namotlalnakayo. Namejwan antlawanayaj, anmopaktiayaj biero itech ilwimej asta ankuawtzajtziay, ankichiwayaj ilwitl para antlawanaskej, iwan ankinweyikixtiayaj namosantojwan katlej Dios mach kineki ma se kinweyikixti.<sup>4</sup> Iwan axan katlej mach kixmatij Dios, mach kimomakaj kuenta tlanik mach ok inwan ammoneloaj para ankichiwaskej tlan amo kuale ken yejwan kichiwaj, iwan por yonik amechpojpoaj.<sup>5</sup> Pero yejwan kipia de kitemakaskej kuenta inawak Cristo de tlan kichijtokej. Porke in Cristo ya mochixtok para kinmixkomakas (kintzonmanas) in tlakaj katlej axan yolitokej iwan noiiki katlej yomikkej.<sup>6</sup> Por yonik, in kuale tlajtole katlej temakixtia, noiiki okinmatiltijkej katlej yomikkej. Iwan maski yejwan yomikkej ijkón ken mikij nochtin tlaltikpaktlakaj, iwan tla yejwan okineltokakej itlajtol in Dios, tones inmespíritu kipias nemilistle ijkón ken Dios kipia.

<sup>7</sup> Ya ajsi tonale para tlamis in tlaltikpak. Iwan por yonik moneki namejwan xikpiakan kuale namotlalnamikilis iwan xikixkawikan (ximomelikaj) ximotiotzajtzilikan inawak Dios.<sup>8</sup> Iwan tlan okachi moneki xikchiwakan yen ximotlasojtlakan se iwan oksé. Porke akin kitlasojtla ikni, weli kitlapojpolwia maski ma tlajtlako miek buelta inawak.<sup>9</sup> Xikinkalotikan amokniwan katlej amechontlajpalooaj itech amochan iwan amo xikintlatzotzokatilikan.<sup>10</sup> Dios otechmakak tlatlamantle poder kada se de tejwan para ma tiwelikan ma titekipanokan inawak Dios. Moneki kiné xiktekipanoltikan yon poder para ika xikintekichiwilikan oksekimej. Iwan ijkón namejwan anyeskej kuale antekipanoykej porke ankimatij kenik ankitekipanoltiskej in poder katlej Dios oamechmakak kada se de amejwan ika iteiknotlamachilis.<sup>11</sup> Tla akaj de amejwan tlapoa de itlajtol in Dios, ma tlapoa kiné kej yeskia yen Dios tlapoa. Tla akaj kinpalewia oksekimej, ma kinpalewi kiné ika noch i chikawalis katlej Dios kimaka. Nochi tlan ankichiwaskej ma yeto para ika ankiweyikixtiskej in toTajzin Dios porke

namejwan ankineltokaj in toSeñor Jesucristo, katlej kipia imawisotlanex iwan kipia ipoder nochipa.

### Tlajyowilistle katlej tipanoaj

<sup>12</sup>Notetlasojkaikniwan, amo ma amechmajmawti nijuak anpanoskej tlajyowilistle. Amo ximomawtikan porke Dios ijkón nik amechyejyekos para kitas kox melawak antlaneltokaj. Amo ankijtoskej tlanik ijkón anpanoaj. <sup>13</sup>Sino moneki sa tekitl xipakikan porke antlajyowiaj ijkón ken Cristo otlajyowij, iwan ijkón namejwan nojki sa tekitl anpakiskej nijuak Yej walmونextis ika imawisotlanex. <sup>14</sup>Tla sekimej amechilwiaj itlaj tlajtote biero porke ankineltokaj in Cristo, namejwan sa tekitl xipakikan. Porke iEspíritu in toTajtzin Dios kajki amotech ika imawisotlanex. Yejwan tlapoaj biero de Dios, pero namewan ankiweyikixtiaj. <sup>15</sup>Tla namejwan antemiktiaj, antlachtekij, ankichiwaj tlan amo kuale o noso anmokalakiaj kan amo amechtokaroa, tones moneki antlajyowiskej iwan ma amechpijpinatikan. <sup>16</sup>Pero tla akaj de amejwan tlajyowia por kineltoka in Cristo, amo ma pinawa. Sino moneki ma motlasojkamati inawak Dios porke kikawilia ma tlajyowi por kineltoka in Cristo.

<sup>17</sup>Yoajsik tonale para Dios kinmixkomakas (kintzonmanas) nochtin tlaltikpaktlakaj. Achtoj techixkomakas tejwan katlej tiikonewan. Iwan tla yen tejwan achtoj techixkomakas katlej tikneltokaj Dios, tones ɬkenamij panoskej nekatej katlej mach kineltokaj itlajtol in Dios katlej temakixtia?

<sup>18</sup>In tiotlajkuilole kijta:

Tla ika miek trabajo momakixtiaj katlej kualtin tlakaj,  
tones ɬkenamij nik momakixtiskej nekatej katlej mach kualtin iwan  
tentokej de tlajtlakole?

<sup>19</sup>Ijkón kiné, tla Dios kimonekiltia namejwan xitlajyowikan, xikseguirokan xikchijtowan tlan kuale iwan moneki ximotemaktikan (ximotemaktilikan) inawak Dios katlej otechchij iwan katlej nochipa kichiwa tlan kijta.

### Xikinmonekuitlawikan ikonewan Dios

**5** Axan nikneki namechilwis se tlajtote namejwan katlej ankatej kej antlayekankej de tiapan. Nej nojki nikaj kej nitlayekanke ken namejwan. Nej onikitak nijuak in Cristo otlajyowij iwan omikke. Iwan nej nojki nikresibiros tlan nechtokaroa itech nekáj tonale nijuak walmونextis imawisotlanex in Dios. <sup>2</sup>Namechtlatlawtia xikinmonekuitlawikan ikonewan Dios katlej Yej oamechinmaktilij, xikinmonekuitlawikan ijkón ken se tlajpixke kinmonekuitlawia ichkawan. Xikinmonekuitlawikan ika kuale amoyolo. Amo xikyejyekokan akaj amechafuersajtia xikchiwakan

yon tekitl, nion amo xikchiwakan porke ankinekij ankitlaniskej tomin. Sino xikinmonekuitlawikan ika pakilstle, ijkón ken Dios kineki. <sup>3</sup>Amo xikinnawatikan ika chikawak ikonewan Dios katlej Yej oamechinmaktilij, nion amo xikchiwakan kej yeskia antekomej. Sino namejwan xiekan amejemplojtin para yejwan no ijkón ma kichiwakan. <sup>4</sup>Iwan nikuak walmonextis in toweyi Tlajpixke de nochtin tlajpixkej, Yej amechmakas se korona katlej kipia imawisotlanex katlej mach keman ijtlakawis.

<sup>5</sup>Nojki namejwan katlej antelpokamej, nikneki xikchiwakan tlan amechnawatiaj in tlayekankej de tiopan. Iwan aminochtin ximotlakitakan se iwan oksé ika kuale amoyolo, porke itech tiotlajkuilole kijta:

Dios mach kinneki katlej moweyinekij,  
pero Dios kipia weyi iteiknotlamachilis para katlej mach  
moweyinekij.

<sup>6</sup>Tla namejwan anmoiknomatiskej inawak Dios katlej kipia weyi ipoder, ajsis tonale Yej amechweyikixtis. <sup>7</sup>Xikilwikan toTajzin Dios noch tlan amechtekipachoa iwan xiktlalikan ipan imatzin, porke Yej nochipa amechmonekuitlawia.

<sup>8</sup>Xikpiakan kuale namotlalnamikilis iwan ximotlachilijtokan, porke in diablo namokontra kineki amechixpolos. In diablo nemi kej se lión tekuaní katlej tzajtzitinemi kitemojtinemi akin kikuas. <sup>9</sup>Amo xikkawilikan ma amechtlani in diablo iwan ximoyekketokan itech namotlaneltokalis. Namejwan xikmatikan ke oksekimej tokniwan tlaneltokakej katlej katej ixko yin tlaltikpak nojki panoaj tlajyowilistle ken namejwan. <sup>10</sup>Iwan nikuak ya antlajyowijkej kanaj keski tonale, in toTajzin Dios kichiwas namejwan xiekan sa tekitl ankualtin itech noch tlamantle. Kichiwas xiekan anchijchikawakej iwan kichiwas kuale ximoyekketokan inawak, para amo keman xiwetzikan de itech namotlaneltokalis. Dios ika iteiknotlamachilis otechnotzke para ma tikpiakan parte itech imawisotlanex katlej yetos iktlanke (ik tlami), porke tisetitokej san se iwan Jesucristo. <sup>11</sup>Nochipa ma kipia imawisotlanex iwan ipoder. Ijkón ma yeto.

### Pedro okonintlajpaloj in tokniwan

<sup>12</sup>Onamechijkuij kanaj keski tlajtlole itech yin amatlajkuilole, katlej namechtitlanilia iwan tokni Silvano katlej sa tekitl kineltoka in toTajzin Dios. Iwan itech yin amatlajkuilole namechnajnawatia iwan namechmatiltia nik in Dios sa tekitl kipia weyi iteiknotlamachilis towan ijkón ken namejwan ya ankimatiij. Ximelajkanemikan itech iteiknotlamachilis in toTajzin Dios.

<sup>13</sup>In tokniwan tiopantlaneltokakej katlej katej itech weyikan de Babilonia amechontlajpaloj. ToTajzin Dios nojki okinpejpenke in

## 1 PEDRO 5

yonmej tokniwan ijkón ken namejwan noijki oamechpejpenke. Noijki amechontlajpaloa in Marcos katlej kajki kej nokone inawak Dios.

**14** Ximotlajpalokan ika tlasojtlalistle se iwan oksé ken Dios kineki.

Xiekan ika yolosewilistle aminochtin namejwan katlej anpowij inawak Jesucristo. Ijkón ma yeto.